

小倉山房詩集

小倉山房詩集補遺二卷

癸丑至丙午刪餘改剩之作

錢唐袁枚子才

擬古

無情生山川無情造舟車今日君與妾遂至淚盈裾盈  
裾不一語掩面立別處此別非昔別此別抱病去須臾  
君不見殘花堆滿徑妾聲君慣聽千呼胡不應妾身非  
白雲君身非青天一台而一離悠悠能幾年

步出燕南門遙望邯鄲市挾彈美少年翩翩似豪士慷  
慨一具陳同是報仇人相將偕一泣携手入其室誰謂  
爾無家黃金絡絳紗誰爲爾無堂瓊樓十二行金石襍  
絲竹音響何嗶嗶飲至耳熱處有客蹙額語主人髮衝

冠拔劍出門去妻兒不敢啼須臾聞馬嘶驚起問何之  
氣激有所爲一諾酬君子萬金養孤兒高義從此聞長  
揖從此辭白雲在天地未知姓名誰

瀘溪道中

山石巉巖碧鮮滋小溪行出櫓聲遲一灣野色垂楊柳  
十里春風聽畫眉戲縛野亭花作帶閒敲河子石爲棋  
龍津尚在江城北烟雨蒼茫有所思

放槩

放槩東風逐水流鶯花深處便淹留衣冠僧識江南客  
翰墨兒呼學士舟碧柳啼鶯千谷靜白雲臥犬一村幽  
早知尚有桃源境土槩年來好遠遊

宿臨江旅店

昨夜華星卸寶鞍青衫異國倚欄杆南人已作西人夢  
花淚還同燭淚殘疎雨一更橫枕聽殘詩四壁拂塵看  
瑤池烟草蓬山雪幾費劉郎玉指彈

途中寄金二質夫

已未入翰林我與君翔步君學自精醇我才較跋扈爾  
我居相隣諧笑靡朝暮各約今年秋努力攻章句庶幾  
砥礪精元白馳雙譽何圖志未遂驅車我南去譬彼女  
蘿枝斷絕窮依附如角原頭鹿委之棄中路鴻鈞付萬  
物去留無喜怒賤子抱區區聊復自陳訴九歲讀離騷  
嗜古有餘慕學爲四子文聰明逐陳腐猶復篝殘火偷

習詞與賦自謂登青雲專精莫馳驚未幾踐玉堂竊自  
比徐庾勉力作象胥三年墜雲霧尙期 廷試畢辛苦  
立門戶豈知俗緣深弱水不留住我 皇重汲黯淮陽  
竟相付從此作吏人仕學難兼顧申韓習刑名桑孔較  
藏庫况復荒歉餘保障煩憂慮不敢理舊妝作官如作  
婦不敢忘本根愛身如愛樹繭絲羅我懷蠹魚撐我肚  
欲以彼易此耿耿不得吐姜維喜用兵投降遭國故賈  
生能上書出爲長沙傅造物好違材鬼神工妬妬不許  
逞全力多端以相誤兩賢豈相阨蓬山君獨踞勉旃扶  
大雅用以荅知遇竹木或亂塗舉盧莫高呼經學恐難  
爲瑣屑浩興疏昌黎博雅人蟲魚譏傳註史家陳興衰

諸子多奇悟研閱宜千帙排比應百部曾見邁古流翺  
翔逐李杜乃若歲九遷尤宜亟時務經綸竹帛光富貴  
草頭露君固金玉器狂瀾自砥柱賤子何復道別景請  
重敘五月事行役熱雲烝汕幕朝飲醒心泉夕餐惡草  
具蒼蠅腐肌膚蟣蝨起裙袴夏苗苦短稀秋霖愁沮洳  
朝來逢縣令清瘦如凋鮒縣令爲我言江南最難作

皇帝愛民心民奉爲孤注借此羣號呼饑黎爭欲赴婦  
女攀輪轅阿官相抵牾帑金雖百萬頃刻寧得富食者  
未覆盆餓者已前仆更聞二麥傷秋來彌足懼我聞縣  
令言惴惴殊自怖書生當民社籌策竟何措跪拜習鞠  
脛冷熱嘗臍醋回首謝故人我與君殊趣願持吟咏懷

絃歌安士庶願持編摩手搜剔除奸蠹幸寬大吏嗔與  
免鄉人惡瑟瑟秋風起木葉下無數雅度想崑田清標  
懷叔度餘子才粲粲朝夕首常聚詩牌肯暫停酒杯豈  
空貯知否南飛禽目極雲深處

初抵溧水縣署

津吏傳呼欵碧輪簿書裁見一番新初官直似爲新婦  
滿眼何嘗有故人

贈易主簿祖栻

我聞易君名七年邈然難接如神仙都人爭傳紅藥句  
天子親題墨竹篇藩王好賢今河獻朱輪延入梁園殿  
上座方知驂客尊揮毫不管旁人羨遊宴追陪奉羽觴

牙襦繡勒何輝煌金轡詞賦驚枚乘明月風流愛謝莊  
江南往歲需人亟先生慷慨思擊楫 君王顧盼日未  
停竿相牽衣留不得君從八月下江陵余亦乘風到石  
城相逢喜慙三生願相對同生萬古情 朝廷聖澤真  
高厚金饑木穰偶然有河決全憑禹力回鴻飛賴有堯  
天覆已持手板落風塵文采風流那復論開倉汲黯雖  
無力立水王尊敢惜身長沙女兒顏如花十年不得來  
君家洞庭春老湘雲薄一夜烏啼鬢欲華君久聘未娶莫把  
衙官惱屈宋茫茫宦海苦從衆庾乘嘗因末坐尊杜欽  
翻以卑官重我贈君歌君和之當頭明月照金卮請看  
牛斗雙龍氣定有風雷拔地時



偶步

偶步西廊下幽蘭一朵開是誰先報信便有蜜蜂來

偶成

月行疑踏水花坐當熏衣笑問梁間燕明年歸不歸

行大雪中口號

珠明衣上水明沙遠遠炊烟剩幾家一個馬嘶紅叱撥  
千村人舞白題斜平林直上無飛鳥天際空行盡落花  
料是東皇小遊戲亂將梅片打行車

厚薄行難穩縱鉦踏有聲禪高矜足白官冷覺膚清入  
港水流澁壓簷人語輕蒼茫天地外玉海是前程

關防承恩寺

面壁禪師此日同更何關節到包公不聞人語諸天上  
剩有香烟一縷中時留香一柱敲鎖始知來水菜閉門惟  
有感秋風廚師皂隸無分別低殺圍棋日幾通

出沐陽口號

征衫斜挂早春天綰綬潼陽愧兩年路餞酒傾七十里  
贈行詩載一千篇無情胥吏多垂泪滿地兒童盡折鞭  
平日使君嫌枳棘者迴回首亦潸然

侯夷門貳尹五十初度卽席索詩

束羊擔酒祝壽星壽星此日兼文星文星闕闕叫不靈  
長吟直入江南城江南縣丞報姓名天使咨嗟大吏驚  
咨嗟不用復何益手板拘人足嘆息信陵公子已灰塵

侯嬴子孫非俊物發來狂疾公何苦枝枝大筆張牛弩

軍糧萬斛老妻馱石臼千斤頭上舞公得狂易之疾載妻運糧以石臼戴

首而舞匣中雌劍聲嗚嗚赤脚神仙興太孤一夕天風吹

落葉十年兄弟聚江湖江湖秋色橫空起秦淮莽莽東

流水烏兔齊驅大海中鳳凰雙立天門裏飲君酒贈君

車感君走筆如龍蛇雙鏡夾鼻眼昏花倒持書卷帽帶

斜銅鉢數聲詩萬字珠璣落紙風沙沙回首長安諸舊

侶二十四人散如雨叔子老如銅雀妓驢材已作令僕

去世上滄桑且莫論眼中車馬如雲屯舉里先生髭似

銀草衣山人白衫巾簾中美人笑且顰座上歌曲宛復

中田郎纏頭美絕倫白雲四映菊花春我若不飲飲不

勝丞不負余余負丞

俗吏篇

俗吏未必從我始吏俗當亦從我止老母迎養病在衙  
有子不見常千里爲官不見良如何朝朝五鼓車馬賦  
參謁大吏苦迎送應荅賓客時奔波金陵內城六十里  
約略一轉時光過歸來但見燈兩廊夕陽同下如牛羊  
嫗婦息子攔滿道牽裾各各陳衷腸但恨長官歸來晚  
不知長官未餐飯忍饑息氣排衙坐欲決不決頭屢顧  
既恐羈遲轉累民又恐倉皇事多誤亂絲抽割將下堂  
猶有秀才呈文章使君既自翰林出不加禮貌非循良  
星落更沉風轉緊簿書束束如春筍滴墨研硃細討論

吏胥乘閒猶舞文回首紛紛幕府進公事併張多報信  
岸獄稍寬逸數囚倉穀逢霉爛一寸抽簿共言糧不足  
願把蒲鞭聊示辱已從漏盡解衣裳重整精神任敲撲  
倦極酣眠門又響失火民呼公速往抽豐賓客太無聊  
重疊書來請絕交仰天大笑卿知否折腰只爲米五斗  
何不高歌歸去來也學先生種五柳

揚州曲

揚州渡頭貴官集揚州船上笙歌急歌舞攔江醉不開  
杜牧乘舟江口來江頭欲問楊柳枝倡條冶葉盡參差  
朝朝迷迭風前賦歲歲琵琶水上詩琵琶彈罷聲幽咽  
紆景流雲風瑟瑟不持手板倚轅門先走江關探月色

江關吹動一枝春。耳目驚飄不定魂。拖鬟帶病倚胡床。  
烏巾束額眉翠長。幽蘭心冷偏宜雪。宮柳情深不耐霜。  
芳年小字從頭問。嚶嚶嬌鶯傾耳聽。未把纏頭取次傾。  
先將金合。今宵定須臾。朔風船面大暮雲黯黯羣鴉過。  
待到仙香天上來。果然明月舟中墮。百花帳冷篆烟孤。  
一笑春生冷漸蘇。袖長悵拂燈花落。爪短私將翠被鋪。  
自言九歲便從師。解誦團雲散雪詞。朝歌紅豆聲長怯。  
暮舞黃鸝力不支。悄悄自憐三生孽。絳蠟分明此意知。  
枕邊言罷悄無聲。冷落殘紅泪暗傾。可憐蕉葉心長捲。  
不信黃河水更清。雄雞喔喔東方曙。宛轉啼襟辭欲去。  
可寧後會是何年。江水茫茫不知處。我生瀟灑吟風月。

此日逢卿愁轉結年少韶光各幾時天涯相見還相別  
遠近飄零蘆荻花東西亂發江城笛孤枕長拋暈未消  
香囊解下痕猶濕寂寞空船獨自歸漫天飛雪荒江白

出郭

出郭剛三日看山過幾灘天陰催晚易雨細望晴難樹  
影千帆亂溪光一蝶寒靜中參物化槩對落花彈

上方伯陳公德榮

海上青桐葉金絲久斷絕不關彈者稀所悲知音歇古  
文三百載流宕無氣脉紛紛述作殊冥冥源流失少小  
學爲文寸心若有得不示并州兒轉恐資談曠安州陳  
夫子來作江南伯曾辭黃鶴樓仙人贈雲笈氣厚如春

雲萬物資潤澤星辰落眼中迥照搜冥渤憐我吏治真  
愛我文章傑曰汝學唐人宋後所不及或向大吏薦或  
問老母疾春風飛九天到處生顏色每一宴風人稚子  
許前席瞻園秋復春百花爛如雪脫畧長官禮散坐隨  
岩穴酒酣天地寬情親魚鳥習嘆息浮世例官階何懸  
隔昇藩至縣令相去一千尺其體稍尊嚴手板多踧踖  
胡公獨不然和光忘謙德喬木覆芳草草本同枝葉大  
江抱清池池水江中出夫子學問大是以契合切借公  
舊甘苦作我新羽翼多感國士知大雅願努力城頭春  
樹青城外春潮白蒼茫憶大賢風雲同激越

觀察台公柱



探懷得明月清光照一躬瞻依逢仁人終年皆春風我  
公烏臺彥江南來花廳管領千神駿不皮相英雄祭事  
如祭眉肌理劈春葱治民如治家江海包雍容長髯秀  
若神華岳神氣通碧天孤鳳凰偶來青梧桐落落官爵  
異悠悠風雅同官衙日無事袖詩相追從上論漢魏始  
下極元明終詩教原溫柔公情更坦融示我一二篇琅  
然清廟鐘願公立朝廷賡歌如夔龍皇唐發元氣雅  
頌陳蒼穹政和人心古永永垂無窮

太守蔡公長溪

繪厚衣不裂酒厚味不酸所以古聖人忠厚愛儒冠况  
我金陵民淳良無黠頑嚴霜八九月草木苦秋寒忽然

春風來萬象同無端閭閻多額手父老亦加餐爲聞賢  
太守諸事靜且安嘗觀兩漢治丞尉濟濟賢何以致此  
盛上不侵其權太守識此意大才藏槩槩真氣溢眉宇  
舉動能自然起視諸吏治脫手如彈丸笙歌遍正月花  
鳥盈江關嘻嘻婦子樂青青野麥攢誰云太平治不在  
張弛寬大網魚亦得小網魚亦難漢代嚴延年渭水空  
摧殘

舟中書懷

烟江遠望欲迷津鎮日推牕看好春笑問往來能有幾  
順風時節泊船人

余與同年曾南村黃笠潭以翰林改官江南六年

矣丁卯秋二人以分校來白下榜後留宿署中  
夜間有作

弟兄難得此黃昏相對江南酒數尊  
荒署偶然聯一榻蓬萊原是舊諸昆  
家僮愛客頻添燭秋雨多情暗打門  
感昔懷今成底事只談兒女也消魂

暫時西笑話長安明日征驂路渺漫  
胡馬戀羣風送別秋江吹笛雨空寒  
颿飛碧海相逢少脚踏紅塵再轉難  
莫道夜闌情未盡數聲官鼓已摧殘

滿庭霜影月華濃葉落天涯萬萬重  
宦況本如秋冷淡歸心休勸我從容  
韶光逝水千年夢聚散關心一夜鐘  
珍重白頭成努力好隨江上采芙蓉

送春

淹留三月動征程從此炎涼逐漸生  
笑我送迎真宛轉恨君來去不分明  
山中啼鳥聲聲別陌上殘花緩緩行  
莫道東皇真薄倖夕陽無限故人情

丹陽道上留別雙郎

姑蘇春水一帆斜惆悵丹陽兩岸沙  
爭奈行船換鞍馬淡煙疎雨別梅花

蝶枕鴛衾夢不成燈花如雪夜分明  
兩行汨落吳江水應有芙蓉處處生

十三名字冠揚州腰帶猶存瑪瑙鈎  
記否空江篷背冷新年聽雨木蘭舟

當筵怕唱六么終頃刻回頭夢已空寄語篙工緩搖槳  
千金難買石尤風

贏得芳名喚滿意枝頭乳燕話雙雙情知送我終須別  
留下香囊伴過江

珍重梨園檀板餘幾時重訪范莊居三秋憶着休貪嬾  
纔歌笙歌便寄書

送安撫軍北上華陽道中作

華陽古道暫停車草木荒荒夕照初一氣盡時看落葉  
萬山冷處讀殘書夢隨棋局飛難定路入羊腸轉更紆  
愁殺班姬舊團扇伴郎纔熱又離居

偶折

偶折花枝懶惜生  
更人擊折又心驚  
縣庭公案秋階葉  
一樣闌殘掃不清

送同年陶京山之官滇南

同年十載前升沉  
兩不知同年十載後悲歡自得之我  
今辭官日送君作郡時君將往滇南  
萬里從此辭倉皇料行李來索故人詩  
故人一舉筆百感如抽絲  
皇帝戊午年孝廉集京師翩翩兩年少  
顧盼無鬚髭我時登翰林君歌歸來詞  
亡何我作吏君鄉我所治君鄉古金陵  
山水天下奇養病乞隨園解組仍棲遲  
君忽捧檄至煌煌腰金龜新官揖舊官  
治化願商谷鬚鬚兩令尹長鬚相支持  
卽此面目問逝者已如斯何況大江波  
滔滔

曷可追今夕復何夕春風吹花枝不恨酒盃少但恨生  
別離不願遽遷官但願長相思明日隔山川皓首爲前  
期

天風閣

山巔起高閣其高與天通明窗廿四扇扇扇來天風呼  
吸飲沆瀣坐指浮邱翁白日出大海徘徊扶桑東未向  
世界白先來此閣紅青青九點烟羅列歸雙瞳笑指大  
江帆順逆誰家篷雪來天地淨月來天地空閣下有浮  
圖偶然一聲鐘

南樓

一樓青山橫滿窗明月冷美人獨上時自踏娉婷影隱

隱聞園聲茫茫雲樹景試向烟中呼飛鴻來亦肯

### 水西亭

活此園內景全在一池水水聲流向西亭以成其美荷  
花十二時濛濛香不止蕩開兼葭霜明月乃在底我學  
李王孫喝月水中起

### 山上草堂

山上有草堂對望北極閣風雨當三面闌干繞四角不  
見世上人但見世上屋不見天下春但見天下綠

### 判花軒

從前判花軒本是在官衙我今移此處四時料理花畫  
圖六十幅書卷千餘車古鼎燒香烟沉吟白日斜黃鳥



如嘉賓早晚來啞啞鳥亦疑此軒道是仙人家

枚年十七杭州朱端士先生命製七十壽序爲忘  
年交再十五年枚歸自江寧拜先生於橫河之  
西年八十九矣神采如故感贈一篇

先生潮眼如明月十五年前懸清光照我一帆掛江海  
雲離雨散三千場我今來訪河水清水流不盡故人情  
先生大笑披衣迎滿堂風雨飛春聲自言昨夜夢我至  
我今果到夢中地前堂燈舞後堂歌分明不是前生事  
先生老筆猶橫陳先生意氣如青雲瀟灑何以送日月  
朝朝磨墨揮千軍萬松嶺上梅花杖龍魚不跨乘風上  
崇文書院湖水邊阿婆塗抹驚少年八十九年春正早

手書亥字知多少棋罷何知歲月更身強只覺兒孫老  
且莫言黃頰青曾變幻餘眼前樹木非當初但記我來  
介眉壽先生見我不見鬚忽然歸娶宮錦香忽然掛冠  
鬚髮蒼君如轆轤轉我腸我如傀儡舞君旁回頭不覺  
春風忙但看江波日夜流茫茫入魯尙拜靈光殿還鄉  
得見中郎面此時相見能幾杯此後相逢知幾遍况我  
風塵累未終買船又作南飛雁錢塘六月潯暑濃雲雷  
日日東南峯感激知已心忡忡願傾東河添金鍾先生  
來醉荷花中年年顏色如花紅

梅雨

日脚未出雨脚入前庭天青後庭黑皇天雜施陰陽功

道是江南黃梅節忽然珍珠傾萬盤忽然瓦簷留一滴  
來如咳噓無定期去如藕絲未斷絕迷宮步障張滿空  
美人一日千回泣雨師心碎耐雜煩陽烏壽短較頃刻  
巾箱氣鬱白毛生寢堂几滑蝦蟆立造化毋乃弄奇怪  
雌蜺雄雷示不測豈知天心愛我民滂沱有意洗吳越  
吳田越田多水稻稻如小兒喜乳汁密雲不交天乳乾  
輓轡聲聲轉愁急兒童迎龍打瓦鼓老叟驅魃鞭陰石  
不願家藏金一流但願塘留水三尺當今西川罷用兵  
駱駝脚住牛背歇此雨直從天河來甲兵洗盡無餘孽  
我時南行揚子江破篷亂打燈光怯滿船渠獵舊衣裳  
爛盡不值青蚨百但願陰雨接秋霖爲天削除六七月

更願酒盃似此雨早晚不拘隨所適

雨夜宿白土

涼雨接路生天地如新浴征夫走旅店波濤逐兩足怒  
潮語敗溝荒燈閃茅屋饑蚊鳴若寐展卷不能讀炙鷄  
得半醉起自理枕褥秋冷從天來先到空床宿美人各  
一方此味非吾獨白土抵秣陵百里猶屈曲路近心轉  
紆五更呼僮僕添驢兩三頭加鞭一百束盡日走江城  
夕陽看修竹

蔣誦先復園宴集圖

復園之奇無不有千山萬山夾花柳復園之客無不狂  
科頭赤腳多徜徉就中宗伯吾同年頭顱霜雪澹若仙

一朝勝事成雅會，盡圖十載猶流傳。我今來宿主人家，  
諸公散盡空梅花。夕陽在天風在樹，美人不來春不去。  
時萬園中訪姜砮子重敲亂石前釣竿再拂雲深處主人把圖  
捉我手，此中面目君知否。家僮父子兼師友，約畧衣冠  
二十九。請君磨墨不開口，一一題罷纔飲酒。我昔無畫  
今有詩，人生聚散能幾時。一床明月一雙鶴，花開花落  
長相思。

寄西江撫軍唐荻村先生

積年懷斗嶽，殘歲拜江城。雪色千窗滿，葵衷一夕傾。相  
知兼兩代，垂感極三生。往日徵詞客，微軀困玉京。詩投  
賀秘監，興借李長庚。月照梅花發，風吹桂樹榮。太常秋

祭罷藩伯粵西行大阮從油幕諸袁藉品評嘯枯台喬  
梓清俸寄蓬瀛乍轉東山駕旋飄浙水旌銅符剛奔走  
竹馬未逢迎霽陽春渥茫茫宦海驚風波身幾度蕉  
鹿夢重更浪拍山仍峻雲開月愈明艱危占定力患難  
見交情 帝念西江地人推元老名匡廬聽號令草木  
鑒精誠 眷注全終始馨香重晚成自憐求病假暫爾  
息塵搜白髮雙親重青雲萬事輕新鴻馳楮墨舊雨托  
公卿 書薦柴耕南 不盡低回意牙琴海上聲

隨園樹上鷺鷥巢如車輪家僮春以戈三雛累累  
委地鷺鷥歸繞樹哀號晝夜不止余悲之爲作鷺  
鷥號子之曲

山上有鷺鷥繞樹尋其雛尋雛不可得鷺鷥鳴鳴嗙嗙  
日哺吾雛雛口張向娘今日銜得蟲娘口不忍嘗直飛  
向高樹雛巢竟兩亡一株復一株樹樹親廻翔雙翎翻  
轉仄兩眼看周詳母子生別離天上風茫茫謂是雛已  
飛翅嫩無因依謂是娘來遲來去無幾時謂是誤所之  
分明此樹枝偶聞別巢啼狀貌非我兒豈不念兒死與  
其猶在茲豈不畏弓繳老身何所辭只恐娘口低呼兒  
兒不知兒去無還日娘呼無盡期我向鷺鷥語汝情母  
太苦恐雛雖長成未必遽反哺請汝廻烟霄免我增淒  
楚鷺鷥如不聞長鳴已三月初鳴聲於邑再鳴聲斷絕  
起視樹根頭草木盡流血

許滄亭觀察馬扶風太史兩老人過訪隨園喜作  
兩叟歌

紅日一丈柴門開  
顰眉皓首兩叟來  
不知爲仙與爲佛  
但覺天風颯颯吹麻鞋  
一叟疑是馬自然紅霞嚼過三  
千年玉尺量我錢塘江  
江上小兒纔扶床  
江水滔滔流一片  
此兒已宰江寧縣  
江月茫茫秋復春  
此兒已作山中人  
山中錦瑟如人長  
老叟曳杖猶來往  
不管南海變滄桑  
但把青山畫紙上一叟自號許飛瓊  
入水不溺火不驚  
洞庭之波知我心  
瀟湘之花聞我名  
半空撒手便飛去  
千金買屋居金陵  
贈我句氣如虹  
驅遣蘓詩如化工  
蘓公已老叟不老  
七十容顏猶美好  
釣鰲長竿爛不



收梅花菊花兩詩稿兩叟兩叟既來過請叟不言聽我  
歌當年兩叟同豪華當年兩叟同風沙叟不見鳳凰高  
翔羣帝傍天公美酒傾千觴此時意氣如海水高濶未  
許人思量忽然黃河捲浪向身瀉泥沙土礫汚衣裳排  
雷斡電雲霧息回頭人世已夕陽又不見老樹槎枒好  
交結根入九霄通南極長劒欲斫斫復休殘枝尚帶人  
間秋吁嗟乎黃土厚碧天高悠悠四海誰英雄縱有二  
三豪健者又使龍蛇蜿蜒生波濤不愁豺虎咬不愁霹  
靂燒但愁將軍七十餘戰後微覺鬚邊霜雪來蕭蕭試  
觀兩叟萬千場如一夢何若青山綠水我今日之逍遙  
水有荷兮如蓋山有榴兮如火長跪向叟問再來果不

果明日兩叟來看山後日兩叟來看我

古意

妾本良家女小小多容芳十三學錦瑟十四彈清商良  
媒于選擇得升君子堂柔心承恩澤翻使愁中腸不愁  
君不愛但愁愛無常平生針線迹都在繡鴛鴦他人所  
織布妾不量短長胡爲衆蛾眉悠悠相謗傷初言君不  
信再言君且防三言君見問四言君撒床妾欲自申明  
有淚聲不揚妾欲誓青天六月無飛霜後言雖有入前  
言不能忘不如辭椒殿嘆息守空房亦自傷薄命豈敢  
忘君王

問月

問他牕外團團月曾在瀟湘見我不十九年中人似夢  
三千里外水空流過來塵海茫茫事難向嫦娥細細愁  
只憶當初相對處潘郎可有雪盈頭

小園

小園花嫩草萋萋公子新歸繫馬蹄愛聽相思怕聽別  
只栽紅豆不栽梨

似村公子清江信來訂相見之期并寄三兄璞齋  
見和落花詩

柳花白處別郎君柳葉青時信又聞知否愛閒多病客  
半年不作出山雲

雙飛尺素遞黃柑先訂西牕酒共酣柔楊一枝波正綠

又搥公子入江南

沐鶴溪邊花亂開  
大郎廻後小郎廻  
通家便是溪頭鶴  
親看仙人取箭來

三郎遠寄落花詩  
清角琳琅幼婦辭  
梅自過時桃尚早  
竟將羌管一齊吹

碩稼梅春溪放艇圖

芳草斜陽軟浪天  
浮家泛宅有神仙  
自搥小艇歌桃葉  
看弄柔荑理釣絃  
山翠遠含衫影綠  
釵痕涼拂水花鮮  
笑儂題罷先生遣  
正爲尋春要上船

陸郎輓辭

有序

郎小字千里薛一瓢  
外孫也膚神兩清玉雪可

念王申五月一瓢爲香山之會命郎出拜今六年矣余再來吳門郎已化去沈歸愚侍郎序郎之敏悟爲小引以徵詩

水南軒上酒盈卮曾見摩挲玉一枝今日童烏同鶴瘞  
一瓢有瘞鶴銘再來秋士對春悲梁飛玉燕魂歸日露冷桐花  
鳳去時嘆息龍門好文字楊家無憚欲傳誰

病起

病起深知萬字虛玉樓已去又回車玉皇問我何留戀  
尙有人間未讀書

彭芝庭少宰招飲卽席命題南陔圖

三徑蘭風愛日長諸公齊咏白華章阿誰得有香山意

親醉裴公綠野堂

菜甲自栽平慮草魚波可愛水梭花寢門終北楓宸近  
睡起紗窗日未斜

贈徹凡上人

山人門掩桃花雨有僧敲門作吳語昔年儒服今年僧  
說到滄桑恨不勝當年儂住館娃宮隣有江君號雨峯  
定交杵臼晨昏共相對芝蘭臭味同江君好古雅成癖  
余亦貪奇愛搜輯朝將威斗辨甄邯夜爲單于題服匿  
其時丹桂發天香令子登科舉壽觴燈燒羊侃金花燭  
銀鑿魚宏八寶床奢豪意氣孟嘗君車馬喧填客似雲  
中有吳閭戴處士當門彈鋏獨超羣處處望舟歌得寶

時時絃索弄參軍明年五月江帆動戴君置酒江君送  
華堂三疊紫雲回分明不是前生夢六載風沙萬事非  
江淹才盡淚沾衣牢盆握罷錢何在窮賈流乾水不歸  
大廈已傾無雀賀夕陽將墜有烏啼戴君飄泊情無賴  
一朝償盡三生債自削頭顱雪萬莖主人尙有如來在  
南宗北證兩相參滌盡塵心號徹凡松花滿洞白雲冷  
欲訪斯人路莫探可憐天道更難論江氏蕭條盡一門  
祖爲憐孫相繼歿兒因哭父又無存斗酒澆殘喬氏墓  
巫陽招斷屈原魂翟公門冷誰相過孤兒曲唱家山破  
惟有方袍圓頂人相看不忍王孫餓意欲推衰好托孤  
公然訪戴涉江湖不辭烟水三千路暫放菩提百八珠

相對青山喜復驚。感僧風義淚縱橫。豈有空門能念舊。  
斷無菩薩不多情。未隔輪迴忘夙業。仍將老衲喚先生。  
先生一榻垂楊下。長日消閒惟有書。隨手拈來總是花。  
有時摩頂松將化。萬樹紅燈半夜簫。江郎携手共逍遙。  
送郎似送毘曇佛。不到西天願不消。香火因緣夢竟醒。  
功成行滿付丹青。他時要說人間法。但誦儂詩當誦經。

春分日似村招飲西園時余將往揚州而似村將  
歸北關留詩贈別卽和其韻

河梁同日感離羣。淚灑羊欣白練裙。二月客從花底別。  
一年春在雨中分。是日燈窓聞雨余驚欲呼與而雨息風窻燈影三更酒。  
玉笛關山萬里雲。狎恰相思何處寄。買絲終日繡郎君。



送潘筠軒學士還會稽

秋花明秋陽故人還故鄉送君兼送秋使我心內傷同  
作寓公人先倡歸田賦衰草凄寒天夕陽引前路前路  
向何處步步入山陰行向吾廬過西湖秋水深蘓武返  
漢關李陵前置酒歌罷泣數行向南頻回首

我爲張童子君爲昌黎賢同出陸公門起家桂林嶺鴻  
爪有陳迹矐靈無停鞭分鑣紫薇省並軌滄江天絳帷  
不可見華髮忽盈顛寸心如月皎萬事隨風旋人老惜  
新別花殘戀暮烟交情或可忘難忘二十年

問官稱學士紫綬腰銀魚問年書亥字鳩杖行鄉閭問  
息有舒祺垂老獲明珠君子有三樂欣欣賦歸歎摩挲

銅狄仙糞除瓜牛廬花下鄉先生田間上大夫飲酒徵  
需雅行樂歌山樞習靜得真逸忘機近元虛念我三秋  
心加愛千金軀乘風復來翔柴門候巾車

重九後一日岳水軒劉南廬李晴洲陳古漁來登  
天風閣分韻

家有登高處門來采菊人重陽雖昨日落帽在今辰山  
頂江浮閣芙蓉秋作春莫教虛此會才語鬪清新

喜西園來白下

喜逢君至桂初香又借荒村草一床夜夜獨歌山絕頂  
雙雙同赴酒千場遲開只覺碧蓮嬾早起始知清晝長  
聽說出門西笑去前途珍重髣髴毛蒼

林輪溪硯銘冊子

不割青雲割紫雲  
屢將貪墨試羅文  
滿房流出端溪水  
此是人間萬石君

硯田原有舊家風  
阡陌親開樣不同  
自製銘詞三百首  
年年耕殺管城公

雙美讀書圖

十二欄杆秋水邊  
珮環聲隔落花烟  
神仙只有天台好  
玉女一雙春萬年

大姑采蓮停織機  
小姑采苧製郎衣  
風前挽手齊一笑  
三十六隻鴛鴦飛

朝雲暮雨半荒唐  
擬把餘生托此鄉  
同是一場春夢裡

誰人得似楚襄王

題元稹決絕詞

疑他神女愛行雲故把鴛鴦抵死分  
秋雨臨邛頭雪白相如終不棄文君

揚州借馬秋玉陸停川看梅平山歸飲天寧寺分

賦

仲月春始半艤舟古維揚爰從陸家秀追陪馬氏良  
出郭至環溪沿流登山堂梅花萬枝雪玉立環平岡照影  
地全白推空天聞香余性愛古玉環珮紛鏗鏘如借綠  
萼華同驂鸞鶴翔山影澹寒流江波沉夕陽歸寺月初  
上風露浩已涼當門好修竹戛耳彈清商重剪華堂燭

各各入醉鄉

與何西舫孝廉遊山後海子網魚而歸

山草長數尺踏草草欲鳴轉側過山背一樹孤花明長  
澗如匹練覆以楊柳青澗邊老田父斗笠來相迎而有  
主人意欸接何真誠儷以樹上桃累累盤中傾桃雖未  
成熟奈此野人情一聲魚潑刺不覺貪心生戲舉緯蕭  
起銀鱗耀眼橫得失占天機豈爲杯中羹既得亦自喜  
歸來索鼎烹遙聽打魚處尙聞大吠聲

花朝前一日周蘭坡學士王孟亭太守涂沈秦陶  
四秀才看梅隨園分得鶯字限七古體禁用瓊  
瑤玉雪等字及梅花典故

主人錢爲梅花輕終朝招客吹金笙來客車爲梅花爭  
長裾襍珮紛相攬青天春爲梅花晴白雲藹藹烘花明  
翩然一揖指雙睛太守學士四門生十二隻履繞樹行  
一枝澹拂千枝迎雪英沁露浮青莖列仙不語烟中橫  
深深鼻觀如有呈諸天宮闕無流鶯有笛不敢作春聲  
有筆不敢矜才情相約白戰無寸兵如滅鬪見遊太清  
雲璈水瑟冰絲鳴髮髻梅花詩乃成諸客悄然酒自傾  
相看臙腑生水晶出門斜月拖江城羣花亦隱夜二更  
懷通家翼雲若進士

星郎踏雪訪牆東自入新春信未通病起擬歌將進酒  
花開誰伴半衰翁滿城門掩清明雨一笛聲寒翠竹風

惆悵南都舊桃李年來賸有幾枝紅

周石帆學士秋林覓句圖

先生本秋士家住延秋里日日望秋來桐音吹滿耳兒  
孫倦讀書大呼秋至矣先生入秋林一坐不能起以茲  
筆墨緣悟彼山水理萬木刊浮華百川清見底松根削  
灑灑石骨露齒齒素臙無近情澹月有微旨先生晚年  
詩所得多類此豈獨木犀香吾無隱乎爾

得桂歎

每買桂一枝直當三千錢偶逢刈薪翁負桂花參天請  
以錢易之盈百翁大喜移植隨園中香冠羣花矣人皆  
笑花下我獨泣花中傷心天下桂何必盡遭逢

清明苦雨寄涂秀才長卿

門掩清明節簾垂雨氣深杏花雖不語寒影恰關心  
煙重濕新綠竹涼啼暮禽春愁無着處題句寄繁欽

董彤菴觀察解組兩年又蒙 廷召將赴長安過  
隨園話別

甘棠枝上慶雲生知有賢人入郡城鄉里久歸龔勝駕  
朝廷猶記弱翁名商量詩句攀花立愛好雲山曳杖行  
坐久不知秋色晚金鞍涼映月華明

浮生踪跡等搏沙記否橫塘小玉家知已忽逢三語掾  
挑燈消盡六班茶一江風定聞呼渡萬里人歸學種瓜  
送出柴門還耳語木蘭船帶幾枝花

公多恕侍



藍士賢刺史乞病歸以畫像四幅屬題

碧落翔丹鳳天衢馳高軒道行得大適風阻且小留賢  
哉藍大夫霜隼橫孤秋刺符必赤緊敷政先安鳩吾  
皇十六年江南迎冕旒其時箕歛者戢戢持牙籌舐糠  
多及米杆道時鳴騶萬目睽睽中斯人獨搖頭請爲何  
易于腰笏自引舟請爲元紫芝于菴陳清謳官辦有時  
已民頌無時休天子聞所聞循良拔其尤錫汝一片  
金畀汝斗大州三年待報最一病生窮愁籃輿還白門  
父老迎道周願繪循吏像四時維珍羞公笑捋其鬚丹  
靑得尚不或坐而箕踞或騎而兜鍪或綠水之坻或白  
雪之邱春秋與冬夏幅幅何夷猶圖中存故我圖外無

他求蕭蕭三月天行李如輕鷗毋使我公歸頻聞蒼生  
憂安得生黃金鑄像從公遊不如留此本傳觀當琪球  
袁子歌爲詩以送賢諸侯

宮保歸自皖江疊樓霞前韻見寄枚亦新自揚州  
還山再依前韻奉呈

皖江歸後詩盈篋又咏倉山繼攝山魚素幾行隨雁至  
馬蹄前歲踏香還

公前年  
至園

漁樵泛宅家原寄蒲柳中年

鴛早斑非把師門當野徑雙鳬紅不到人間

先生嫌枚  
朱履太早

之故及

苦被風花累不勝十方願力摠輸僧當樓舊署書千卷

隔竹新添水一層同有樓霞分小大

公顏隨園  
爲小樓霞公然吏

隱園精能未知手造靈臺者可許儂爲左右丞

每因山好忘家窮鎮日平章一畝宮江影自涼高閣上

書聲時度小溪東久離蓬島津難問悔種桃花路轉通

月滿南樓懷絳帳雲中遙見兩旗紅

登天風閣見制府牙旗

野人新自邗江返揚子中冷水獨嘗同抱遊情歸更晚  
各依前韻咏何長爲園請額公先笑對壁籠紗我敢忘  
留取千秋傳雅事眉山衣鉢本歐陽

烈女祥符詩爲寶觀察作

青陵臺上鳴鴛鴦清風嶺上飛嚴霜女兒祥符才笄歲  
栢舟一誓追共妾輕車都尉巴公子生來弱不勝羅綺  
花暎桃夭僅一年雪壓瓊枝終不起新婦入門無舅姑

捧匳沃盥侍兒夫將身求代啼聲苦視藥溫涼燭影孤  
藥砧數盡留難住呱呱稚女相隨去不見雕梁燕哺雛  
空聞落月烏啼樹人言夫死妾難從妾道郎行且待儂  
黃泉不比關山遠只隔陰陽路一重不剪雲鬟服不變  
與郎暫別旋相見戚里遺將髻上釵侍兒分與粧臺線  
要使郎知死後心不教妾改生前面旁人勸罷淚如絲  
苦節分明皎月知一腔碧血分明處三尺紅羅宛轉時  
聖朝綽楔表徽音紫詔鸞書獎更深誰將趙女磨笄石  
鐫作張華女史箴

雨

雨疎如曉露簾影晝沉沉能使小窗暗更添高樹深潤

宜三月暮涼見百花心長願黃梅駐炎暑永不侵

送劉介菴入都

一年兩年顏色老一個兩個故人少客去梁園碧草新  
烏啼白下江村曉江村三月杏花紅江淹賦別愁春風  
三千里路去雲外十六載事來心中我昔見君未華顛  
君昔見我美少年高歌酣顏能幾日盛年一過如雲煙  
秦淮水榭歌成隊金釵挂燭留髡醉各折花枝當酒籌  
同參金母飄霞珮謂金郎江外傳呼令尹來琴堂屢報雲  
仙會扶桑一夕天風改我竟抽帆先過海回首昆明劫  
後人淮南只有劉安在草草黃金信手消輕輕烏帽被  
風飄帳中未散彈箏伎吳市先吹乞食簫丁期甘爲桓

元死狎客都成患難交

聞金郎爲君破家

可憐六十已平頭重

整羸驂北地遊上界星多官易補將軍緣盡客難留

府大

不肯

征途落日長安遠珍重蕭蕭吳髮短苦道相逢未

必逢思君腸共車輪轉

### 送李再來入都

白下清明柳半含爲君折柳送行驂中年遇別先惆悵  
舊雨關心只二三好聽曉鐘趨玉陛但逢流水卽江南  
郵亭若作隨園夢千樹銀燈酒正酣

中秋宮保招飲會枚渡江未赴次日歸踐前約卽

### 席賦呈

中秋曾約赴華筵江上人行細雨天深感西園一杯酒

花間等到月重圓

詔書讀罷淚繽紛從古知臣莫若君誰是升堂高弟子

千秋身已托青雲

詔本朝科目惟尹繼善鄂爾泰兩人

公子將歸詞客老大家珍重話清宵西牕離緒西園柳

一樣風前萬萬條

時璞齋將赴京師

夜深手札出深閨勸我新歸應早回笑殺公門嬾桃李

五更結子要風催

枚與公子夜坐公從後堂札示云江上新歸須還家補慶姊使姪人懊惱

接宮保和送行詩疊韻再呈

將鳴珂馬入楓宸猶寄新詩別釣綸忙有工夫酬筆墨

交惟雲水最心親貧吟我每輸元老嬾送公當恕病人

回首茅簷尙留戀廿年江上四番春

公詩有茅簷疾苦之句

宮保再和

我將北上觀楓宸君在江干理釣綸卧病不嫌高士  
懶言歸便覺故山親追思往事成前夢再唱驪歌賸  
幾人去路何愁霜葉冷風光已近小陽春

揚州吳義山五十生子索詩

石麒麟降太嫌遲惹得而翁兩髩絲燕姑三更徵吉夢  
商瞿五十有新詩生當瓊樹花開處抱看吾皇駕到  
時時值南巡如此佳兒真萬福桑弧應挂最高枝

秋興

采采繁英滿數邱自看風色捲簾鉤華燈見月光先淡  
細雨含花影亦愁萬種秋聲歸落葉六朝全局在高樓



憑欄掉首緣何事又見新霜上瓦溝

卽事

漸漸金風動井床  
差差荷葉送新涼  
寒蟬心事無人識  
苦抱青枝叫欲狂

半山落日影亭亭  
雲外天鷄斷續聽  
坐到月明風漸緊  
一痕煙斷萬山青

彈着風琴坐露臺  
屢聲拂拂草痕開  
柴門客到無人管  
徑向白雲深處來

九月初二日雨

浙浙聲何急蕭蕭意獨長  
山中三日雨世上幾重涼  
雲影過深竹秋容滿畫堂  
孤花無賴甚態似望殘陽

冬日作

吹律清商變高歌白雪交新霜初試瓦朽樹欲危巢日  
短明燈補窻寒苦竹敲冬心終未負吞易注三爻  
滿背飛黃葉扶筇踏白雲九州同落木一雁感離羣樹  
禿長江近松青百草分夫容好顏色遲暮怨湘君  
目中鴻爪去意外雨聲來小雪如春暖黃花夾杏開山  
深無宿客月好有空臺隱几昏昏坐殘書理幾回  
落日上海樓江山面面收紅牆蕭寺小黃瓦孝陵浮暝  
色千村靜長年一葉愁流黃中婦語好整鹿皮裘

爲陶西圃催粧

故人遠去最消魂萬里携囊襆被身欲折長條無別物

自家山裡一枝春

小園凍合短長橋漠漠寒雪雪未消一夜老梅來破牖  
東風人日是明朝

小紅歌罷衆山青楚雨吳雲一路情更愛河陽種花日  
天桃先傍馬頭明

種梅

迎來水綠山青處種到參橫月落辰我聘梅花如聘婦  
入門才是我家春

紅籬翠竹板橋東保護瓊瑤不受風四面香雲千片雪  
孤亭一箇放當中

看梅

曲曲長廊雪打頭  
啾啾翠羽漾春流  
香心飽滿春風軟  
熏得樓臺影亦愁

自春花片作春糧  
仙鶴肥如白鳳凰  
問是客來誰引見  
幽人領着玉千行

巡簷索笑兼招客  
護雨遮風又嬾眠  
閒處春愁忙處醉  
與他同瘦十多天

笑將雙髻鬪橫斜  
自曳藤條吸晚霞  
尙有一枝山背後  
絕無人看只開花

題方問亭宮保貯蘭圖

芳草一枝佩古人  
千載心君子抱晚香  
臭味與之深鬱鬱  
鬱平泉莊蕭蕭梧竹林  
鄴侯手素書王儉插斜簪  
對茲

蘭蕙叢間作盆池吟春水生寒綠華月明幽襟寸心與誰語天風鳴玉琴

樹棘秋得刺樹桃秋得飽所以樹木人貯材擇其好公爲八州督報國恒苦少惟有儲人材栽之如香草當門勿輕鋤孤根苗使老盆舊發花稠泥深得春早竹以虛臣心梧以招鳳鳥回首笑謝氏堦庭作私寶若云夢徵蘭祝公轉嫌小

我昔過保陽縣令逢周君爲言老尚書譽汝頗殷勤枚也如小草甘心蕭艾羣何堪備藥籠芳訊聞氤氲惟願韓太尉愷澤流脊雲遺曲厝元聖洽湯垂清芬九天珠露沃百代光風薰曾使空谷士馨香時時聞

蔣秦樹中書以垂釣扈蹕兩闕屬題

捶釣控大馬釣海掣神鰲從來英雄人變化隨所遭君  
本古漁父蓑笠蹲煙臯來迎周文王漁歌當簫韶三百  
六十釣頃刻化旌旄錫之器與爵命其騎而袍扈從獵  
岐陽石鼓煩推敲天山雪中明柳外黃旗飄萬馬聲鳴  
鳴繞帳生波濤作書與魴鯉我輩豈蓬蒿當其射猛虎  
何異登長蛟人生如明月隱現不終朝雪泥存兩爪畫  
頰添三毫畢竟何者樂一笑霜天高

輓孫柳村

春燈握手漏沉沉惆悵蕭郎寄訃音兩耳久無天下事

一帆歸有首邱心

先生居制府幕以薨乞歸

芙蓉舊幕花仍發老樹

秋風葉不禁重過師門東閣地館賓遺跡怕追尋

新正四日宮保寄詩及小棲霞匾額署曰子才太

史賦詩志謝

才領東風四日餘尙書詩已到蓬廬喜看題額先春至  
愧把頭銜照舊書元旦一晴諸事好梅花千本向陽舒  
請將拜賜陳情意當作新年試筆初

宮保和

蓬島身遊弱冠餘風塵十載入山廬頭銜縱換成仙  
吏香案曾經號秘書三字額懸花正放一園春滿日  
將舒白雲深處扶筇好莫道蒼髯不似初

子才有鐸  
鬚之作故

云

馬鞭

管絃聲裡撻鞭去斜指江南水一灣帶雨催程芳草渡  
隔花傳響夕陽山春隄手倦天將暮錦障泥深路本艱  
寄語行人莫輕用恐教良馬淚潺湲

古琴

三尺清琴錦一端懸時當作古人看年多徽牘黃金影  
聽少絃生白雪寒海內清商無正調煙中離恨有孤鸞  
高山流水秋心老就對鍾期也不彈

許郎席上追和莊念農刺史景陽閣韻

霜林十月小陽春蕭寺題詩粉壁新傳說瑤池仙子會  
滿身香雪看花人



袁絲無福扣元關打漿橫塘客未還讓與羣公秋世界  
半江紅樹一樓山

莊周久不聽青槩忽遇飛瓊又賞音可學聞香僧破戒  
十年一動看花心

紅兒寵盡雪兒誇聽過啼鳥又曉鴉只此簾前方寸地  
幾枝簫送六朝花

落葉飄離雨絕天袁絲豪竹寫中年青蓮何在東陽老  
自顧浮生亦黯然

謂晴江補蘇

除夕宮保許賜食物而日昃不至戲呈一律

手把屠蘇酒一卮盼春不到覺春遲已看臘雪消將盡  
似對寒梅有所思原憲家貧人事少彭宣年老後堂知

良辰擬獻椒花頌未敢仍吟舊歲詩

元日宮保補賜食物五種

元日辛盤至常榻首拜嘉留將殘臘雪開作早春花物  
比雙南貴恩同五福加荷囊尤艷絕傳遍野人家

滌齋先生八十索詩

三朝雨露一生春畫錦堂開慶八旬  
薤榜久無同輩客瓊林偏有再來人  
蟠桃樹老生花早玉女風高進酒頻  
剛是日長添線節南天雲物倍精神

辭却中丞奉板輿稱觴偏愛小西湖  
膝前蓬島三珠樹座上香山九老圖  
水竹風懷類園客滄桑閒話共麻姑  
江城歲歲看花遍鳩杖隨身不要扶

小倉山房詩集補遺二卷

錢塘袁枚子才

宿莊念農河房作

竹枕支床卧不成與頭歷落總無情  
砧聲夜靜家家少布被秋來漸漸輕  
近水易看簾月落朝東先見紙牕明  
披衣急起將詩寫遲恐茫茫百感生

到江上送同年馮潛齋侍講卽次原韻

江口同年話別時隔城敢問夜何其  
瓊林宴罷分飛早君館選後卽乞假尋親南海雲深見面遲  
春夢那堪談往事白頭難定是前期  
君歸若對羅浮月好折梅花寄所思

題解仲發秀才山莊卷子

不見詩人十五年相逢彼此各華顛披圖還是當時貌  
細認丹青一惘然

清涼山下夕陽斜竹徑茅蓬處士家我有隨園最隣近  
三春同看一山花

一句新詩動相公十年東閣坐春風而今重過招賢館  
酒賦琴歌夢未終

秀才以多讀詩書命亦佳之句  
爲尹相國所賞授館十年

要從四庫問三生才得西歸又北征我是南朝沈家令  
衰年難別范安成

君効力四庫館  
又將赴補

題沈秀才洗硯圖

伯時好洗玉倪迂好洗桐先生獨洗一片硯所好與古  
將無同先將取硯法部居別白言其畧旋作洗硯圖命

丹青手相描摹梧桐之陰五月涼先生科頭意若忙呼  
九硯來如賜浴奚奴次第投滄浪參之太史著其潔此  
意毋乃通文章我聞楮先生管城子一齊大笑爲君喜  
硯上之塵尚且無胸中之塵可知矣

陶京山六十索詩

花甲筵開深柳堂南都人祝魯靈光我來高唱蓬山曲  
三十三年話正長

記訪江南第一仙長安二月杏花天祇今尚有金臺月  
曾照當初兩少年

君戊午科江南第一

江左飛鳬過故交琴堂幾度聽雲璈只談風月無餘語  
想見襟期華嶽高

滇南循吏首相推  
閩海歌聲遍草萊  
誰料淵明家法在  
種成五柳便歸來

菟裘何處築牆東  
天爲安排一畝宮  
絕好青溪起華屋  
經綸重展水雲中

月榭風廊高復低  
垂楊飄蕩水亭西  
玻璃窓隔三層望  
就使神仙坐也迷

仙鹿呦呦隔院譚  
古梅修竹自橫斜  
今年應燭看園叟  
添種蟠桃一樹花

仙家夫婦有劉綱  
同醉瑤臺紫玉觴  
月姊生辰春更早

樊英先拜又何妨

夫人長先生五月

繞膝瓊枝繞砌蘭  
一家風月慶團圓  
晉陽刺史真純孝

爲捧流霞暫挂冠

滄桑世事且休論同看宮袍舊酒痕長願香山雨舊舊  
年年白髮說開元

余以丁未年入泮今又丁未矣戲作重赴泮宮詩  
記得垂髫泮水遊一時佳話徧杭州青衿乍著心雖喜  
紅粉爭看臉尚羞夢裏榮華如頃刻人同花甲已重周  
諸君可當同年看替采芹香插白頭

方次耘司馬遣朱郎餽食物戲書其扇當輟腳錢  
家住橫塘烟雨鄉曾經歌曲唱伊涼憐卿身似小楊柳  
才別幾時如許長

珍物分明海樣投主人風義重千秋笑儂頗有高瓊癖

欲把奴身當禮收

題何蘭庭紅袖添香圖

不是騷人太不廉  
青編紅袖一身兼  
讀書要學燒香法  
耐得工夫細細添

匡床八尺夜橫陳  
久坐渾忘枕上春  
莫惹一雙紅袖怨  
隔生休嫁讀書人

太白樓

謫仙何處去太白  
一星知秋樹還披  
錦江聲學咏詩高  
樓離月近平水過  
舡遲我欲先生偕  
長虹作釣絲

立秋後二日張荷塘世講以詩問疾奉荅兩章

五言佳句等長城  
一紙傳來讀便驚  
肯向山中詢白髮



可知心上有蒼生通家人少交情重循吏名高爵位輕  
聽說訟堂無底事吟聲才罷又琴聲

非公不至宰官家偏過君門必駐車入座頻傾白墮酒  
分甘遠惠綠沉瓜蒙惠西瓜風多暑帶將殘意雨久荷開不  
斷花料得張堪應含笑今秋民有好禾麻

張和

山中別業半依城路僻林深鳥不驚欹枕窻前聞澗  
落杖藜脚底看雲生榻因好客終朝設身自辭官世  
載輕數與接談多近道寸莛直許發鐘聲

當初叶卜此移家陌上圖書載幾車作傳自緣彭澤  
柳謀生人識五侯瓜招尋難得心相印篇什看來眼

欲花經月匆匆踈問訊紛然案牘正如麻

疊韻贈明府

難得詩人共石城一回詩到一回驚堂前案牘從容理  
筆底風花傾刻生丹桂心幽招隱易碧梧秋老下階輕  
衍波箋到挑燈誦愈信秦吟是正聲

公涇陽人

九世同居有幾家爭禁民看使君車

君九世同居奉政首旌獎

如子產非操火面類臯陶豈削爪此日絃歌方滿耳他  
年旌節定開花多君馳驛將詩改心細還如一縷麻

前詩起句未妥遣一騎持箋來換

張和

寓公老傍石頭城早有文章海內驚白髮千莖如雪

淨洪談四座尚風生  
暄妍檻外花光麗  
陰翳簷端竹影輕  
一語堪憑爲頌禱  
聞亭世世讀書聲

論交原是舊通家  
門外來亭問字車  
欲把藏書倒篋  
皮有煩留客具茶  
瓜勞生難說心無  
雜廢學空慙鬢  
已華終擬相從聞  
道要因依笑得比  
蓬麻

### 三荅

詩才久慕謝宣城  
五接雲箋喜又驚  
作吏如何航此事  
讀書原本在前生  
七條絃爲鐘期奏  
萬戶侯因張祐輕  
莫道風塵無我輩  
鐘山新有鳳凰聲

翠微亭下野人家  
幾度高賢駐小車  
豈爲後凋憐碩果  
轉因不食愛匏瓜  
兒童競捉初飛蝶  
古佛偏拈已散花

倘得秋涼蘇老病定來扶杖話桑麻

四答

相離未隔一重城兩月乖分夢亦驚佳句得來勝珠玉  
好官從古屬書生才高自覺風雲濶情重翻疑華嶽輕  
連日清商吹到耳滿天涼雨作秋聲

敢把衰年鬪作家戲隨佛法演三車饑同東哲思胡餅  
君家作餅最  
佳故思之恩感齊桓賦木瓜雨引斷雲歸曲徑風催

老樹發孤花陶潛樂事君知否添種柴桑一畝麻

五答

屢見珠璣落管城紅箋飛下白雲驚豈徒吏術堪千古  
便作詩人也一生燕寢風和鈴鼓靜秦淮水長蒲紅

何當手弄桓伊笛閒坐青溪聽政聲

我是南朝仲蔚家年過三十早懸車偶因見獵全忘老  
敢說投瓊必報瓜綠字喜逢青鳥使白頭愁對紫薇花  
一塵幸托神君庇卧聽隣姬夜績麻

園中紫薇大開

### 六答

隨園已築受降城露布傳來我又驚諸葛祁山兵六出  
遠公蓮社證三生才如天馬行空慣筆似蜻蜓點水輕  
聽說輿臺沾雅化滿街呵噉盡詩聲

故人風義恤貧家餽物前車接後車

蒙雨陽點心

月姊瓊酥

開作餅安期仙棗大如瓜君真白雪高難和我勸優曇  
少作花牆上碧紗籠已滿張顛珍重字如麻

題寶堂主人雪灘鴻影圖

人生所到如飛鴻飄然而下過卽空但須留影記西東  
方知某某爲遊踪當今儒者有吾宗觥觥束修行已恭  
治經已追駢子弓古文更學王荊公與余道義相磨礱  
三十餘載無異同忽持木鐸來吳中士林仰若泰華嵩  
雪灘之旁半畝宮先賢於茲張釣篷石橋橫駕青天虹  
枝枝楊柳搖春風先生含笑常支筇彈琴坐咏先王風  
命丹青手描其容寄索我句開心胸我思韓孟本雲龍  
勝地有此主人翁何不相逐行從從灘上同酣酒百鐘  
使我影亦常追從可奈髮禿形疲癯心雖欲往興已慵  
詩雖有盡意無窮掩卷尚覺雲重重

宣州道上遇孫敦夫太守作

已未正月余寓孫牧堂翰林家公子敦夫才七  
歲別四十餘年孫守宣州而余遊黃海突逢道  
中奉贈二首

五馬旌旗狹路逢下車人忽問衰翁爲言四十四年別  
可認當時七歲童

姑停那敢忘君家春雨盈盈燭影斜還借君家池上水  
照儂初次插宮花

題畫

有序

庚辰二月二十八日唁東陽公子之喪代檢所  
藏書畫得余舊贈補蘿高克明神駿一幅未及

十年哭及兩世不禁人琴之痛爲題數語仍付  
童孫夢蘭收之

記贈東陽畫星霜未十年今朝重過眼兩世已黃泉題  
墨痕猶濕知音客盡捐郎君才九歲交付倍淒然

將往揚州阻風宏濟寺贈默然上人

入門修竹倚風翔下界蘆花九點涼海內雲烟留勝迹  
中朝人物聚文章江流萬古山僧老潮打空城草木荒  
半偈未留筵又轉禪關回首正斜陽

何須撒手問懸崖仙佛原須絕代才石幕勢吞高殿起  
江帆影射畫堂開阻風莫悵前程緩失路方能福地來  
累我一官塵幾寸朝衫今日點蒼苔



上方九十老支公煉得容顏瘦鶴同謁我但叅鳩杖左  
送入偏過虎溪東誦經音韻江聲裏入定神光水氣中  
三萬六千回日落問師親見幾回紅

拾級攀梯不憚遙公然耳日到雲霄舟中夜夜東西笛  
江上年年早晚潮滿壁詩人多聚散六朝老樹半蕭條  
空桑爭道無留戀何計揚州駐短橈

爲馬所驚補作

有序

丙寅五月余宰江寧捕蝗七里洲馬爲野豕所  
驚怒逸不止余強勒之馬竄入廢寺門攔橫木  
馬可入而馬上人必折頸以死矣馬竟騰身而  
進余私念死可也如此慘人必疑有隱慝焉此

念甫動馬忽然止若泥馬然似有人攔之者余  
從容跨下牽縛樹間良久輿從踉蹌來告以故  
有驚喜泣下者事隔四十載痛定思痛追作一  
首

驚馬忽然止宛如潮水平眼前無性命天上有神明隱  
隱是誰救蕭蕭何我鳴阿誰到此際能不憶平生

讀唐書

人老氣衰則鍾情轉甚唐明皇歸南內後追念  
玉環依依不捨作太子時起兵入宮上官婉兒  
執燭親迎以請睿宗監國表示劉幽求劉爲代  
請度以常情頗應寬宥而帝不從卽斬下其

英武與晚年光景絕不相侔何也

旗下三郎寶劍開  
婉兒親自點燈來  
奈逢龍子初飛日  
了却蛾眉首不回

閨怨

分明共枕又齊眉  
夢醒蘭衾冷半邊  
急起挑燈探消息  
兒夫私抱阿誰眠

甘露

甘露聞奇禍高天  
隕角星麒麟無轡策  
鷹隼有雷霆  
爲防秋隔書因絕塞  
停空山留馬迹孤劍走龍庭  
慮喪孫印首偏遭鄧艾刑  
他時懷李牧臨陣失甘寧  
賀酒仇家飲書詞海內聽功高魂自壯  
冤甚目難瞋一代丹青

議千年野史亭私情與公論同付淚熒熒

尚有臯陶鬼能空貫索囚如何檀道濟枉唱白浮鳩鑒  
極臯蘭下提歸贊普頭修期馳露布馬燧賀宸旒半夜  
天星動長城萬里休五聽聲未畢三丈血先流誰訟陳  
湯罪空懷谷永憂歐刀秦下相草索漢涼州黃雪飛炎  
海紅霜澹早秋傷心丞相議真報郵支仇

英武與晚年光景絕不相侔何也

旗下三郎寶劍開  
婉兒親自點燈來  
奈逢龍子初飛日  
了卻蛾眉首不回

閨怨

分明共枕又齊眉  
夢醒蘭衾冷半邊  
急起挑燈探消息  
見夫私抱阿誰眠

甘露

甘露聞奇禍高天  
墮角星麒麟無轡策  
鷹隼有雷霆夢  
爲防秋隔書因絕塞  
停空山留馬迹孤劍走龍庭  
慮喪孫叩首偏遭郤艾刑  
他時懷李牧臨陣失甘寧  
賀酒仇家飲書詞海內聽功高魂自壯  
冤甚目難瞑一代丹青

議千年野史亭私情與公論同付淚熒熒  
尚有臯陶鬼能空貫索囚如何檀道濟枉唱白浮鳩  
極臯蘭下提歸贊普頭修期馳露布馬燧賀宸旒半夜  
天星動長城萬里休五聽聲未畢三丈血先流誰訟陳  
湯罪空懷谷永憂歐刀秦下相草索漢涼州黃雪飛炎  
海紅霜澹早秋傷心丞相議眞報郅支仇

行役雜咏

有序

乾隆元年余才弱冠赴粵西一路賦詩甚多六  
十歲編集嫌其少作盡行刪削不料嘉慶元年  
六月偶觀杭董浦先生詞科掌故載余詩文甚  
多頗有可存者因命阿通錄出分入補遺

男兒年二十漸衰珠玉顏況乃遠行役風霜悴其間看  
書未終卷坐看白日還所著一尺高不供史家刪勉旃  
崇事業銀管長斑斑否亦煉玉液金骨到仙寰生人皆  
山水且共耐清閒

搖筆非搖槩往往凌風雲磨墨如磨劍要使光采新甘  
醢非吾好苦吟情所欣萬謀窘一字迫如臨三軍

南遊過楚江西征臨越甸當塗想分割龍津憶征戰或  
營酸棗臺或起明光殿平吟開歌舞危嚇收組練亾何  
歲月流悲哉日如電白骨埋荒煙朱扇罷華宴史冊尚  
流播山川滅聞見秦宮無遺瓦漢苑少殘箭黃雲自南  
飛白日但西暝閨寂窘游志衰颯窮遐睠桑海不終朝

歎者凡幾遍平生豪橫心雖悟不得遣

舟中遣懷寄諸同學

曩者氣不羈束之恆怏怏頗欲學史遷遠遊恣豪宕大江旣失派百川誰導漾慨然投吾筆飛劍凌逆浪不圖舴艋登剛逢江水漲風曳舟如顛雲樹同揖讓偉哉山川勞姦巧門新樣朽木鬼魅形野花兒女狀怪石插天屏巉然自闢創披髮列水陣唐突與舟抗拗怒怯鬼工經營想天匠乃藉草爲茵乃折松爲杖或將秦瓦搜或把漢碑訪朝愛碧鳥啼夕驚漁曲唱臥月如貼玉背花勝挾纈夜橫青山枕曉揭白雲帳精神交煙水疊刻相淫澆魂夢入菰蘆清氣亦來往日月有根柢乾坤空依



傍望遠志多闊歷險氣愈壯祇恨久綫路三月未入廣  
喜近入巨河客價登小舫已經蛟涎滑兼之秋陽亢屈  
曲柔腸骨逼迫窮俯仰年少不燥戚路歧亦惆悵豈爲  
魯連書射之解燕將豈爲昌黎書投之唐宰相悠悠世  
相嗟區區天或諒旣肯將我生自然好安放遊子雖憔悴  
故人應無恙胡牀或忘伊南樓定憶亮已爲黃鶴遠  
庶免鸞鳩謗當歸莫相寄遠志苦無脫魂飛親舍雲目  
極天涯嶂生平越鳥心舉坐猶南向

元日勾當公事宿牛首叢雲樓作

作宦誰如我新年肯看山江城牛背外歲月馬蹄間客  
到日將晚僧閒門未關坐收諸景象不放夕陽還

古塔凌南極寒光射碧波殿荒陰氣重鐘老破聲多碑  
碣星霜蝕銅鈴風雨歌茫茫煙霧裏六代舊山河  
四壁窗離地三更月在天風聲江欲近佛語磬爲傳飛  
鳥鞋邊過空樓樹頂懸九州人事隔醒醉總悠然  
名山終欲別官苦不如僧浮世緣應了行雲笑未能採  
來新野菜歸踏好春燈兩眼蕭蕭冷頭銜本是冰

赴選長安滁州遇雪

我行滁州道一車百夫扛其時天雨雪凍蠅亂打窗一  
山青未了一山白又忙瓊瑤三萬丈扇扇屏風張如以  
玉剪刀裁割青天方荒荒江海霧一色水銀光僕夫與  
主人麻衣無短長瑟縮僵蠶影掉擢背泥漿坐車如坐

船望店如望鄉安得回馬首還家醉千觴

昭君

歲選良家玉一枝六宮深處有誰知  
椒房絕少堂簾隔何必重重用畫師

管仲墓

滕邑古城東碑鐫管仲墳遙望但纍纍  
莫辨墳與田老僧爲我指墓在棗樹邊  
黃土微隆然種麥已芊芊憶昔薰沐相  
桓公山高乘馬羅兵戎犧牲玉帛動海內  
都在青山親見中于今青山猶未改仲也  
精靈復何在千年白骨化灰塵萬國諸侯  
亦滄海喬麥茁茫花亂開上卿之祭何人  
來清風那識齊家土過客猶知天下才誰  
道

功高震列國依然一死同  
溝瀆朝看寶玉斂璫璵  
璠暮見犁耜碎石柳當年  
身作王侯佐今日人耕  
身上土茫茫黃土總無  
言思量長令行人苦

柳下惠墓

野無青草一坏乾  
牛觸荒碑石已殘  
萬古滄桑都變盡  
依然直道事人難

風前

風前對鏡笑潘郎  
纔見鬢鬢又見霜  
萬里雲霄雖早達  
一生心性愛疎狂  
雜花生樹春三月  
素月流天雁數行  
此景思量最堪惜  
已經虛過少年場

精侍中祠

五曜爭天出何人識紫微獨將名士血酒向故君衣廟  
古松楸老山荒鳥雀飛華亭聞鶴者魂魄向誰歸

劇微墓

三分楚漢中原鹿計定難教口不開悔到英雄方信命  
脫還湯鼎始稱才千年烏兔穿荒冢四面河山背將臺  
畢竟黔彭非健者更無一犬吠堯來

偶成

未必今宵是深知昨日非興來開口誤嬾後故人稀耐  
雪千峯定爭春萬鳥飛行藏吾道在高挂芰荷衣

驪山

驪戎之山五里高古柏蒼蒼繡綠毛下瞰潼城似棋局

春樹高枝青出屋憶昔始皇初建都七十二萬驪山徒  
百夫運石千夫唱水銀江海黃金鳧一朝火起咸陽宮  
白骨無靈怨牧童後王不鑒前王失復道離宮重鬱鬱  
朝元閣下洗花枝丹鳳樓中吹玉笛可憐鼙鼓動漁陽  
白髮三郎號上皇衾枕人亡花寂寞笙歌夢醒月淒涼  
兩朝全盛不終朝身後身前共寂寥況復千年成故國  
幾番戰血洗寒潮惆悵人間萬事非青山寒雨鷓鴣飛  
秦宮漢殿知何處指點虛無淚滿衣

登潼關城樓

秦地高樓接列星雞鳴函谷帶笳聽秋搖華嶽三峯白  
山對黃河九派青夾道車聲盤絕壁半天城影插圍屏

可憐百戰爭雄地風至猶聞草木腥

自西安南歸陝州阻雨

一領麻衣兩淚垂不圖如此作歸期空搖風木秋千里  
愁對蓼莪草一枝夾道泥深車迹少恐棺心急馬行遲  
山川滿目潄潄雨似爲楊朱泣路岐

尹宮保幕府鉅牧村騎牛圖

濛濛楊柳煙蕭蕭杏花雨山村是誰家牧童相爾汝朝  
騎一牛去叩角歌烏烏暮騎一牛歸兩角挂漢書騎牛  
何所往道看新苗長日落無人聲雲中山泉響

壬申正月朔同飲倡樓家頗類牧犢子當春看春花一  
別十五年兩鬢清霜加出圖索我題撫卷生咨嗟騎牛

入空谷騎馬入官衙畢竟何者樂請君談些些

送張東臯分司遷貴州鎮遠太守

相國門風舊通家意氣真一陽回暖律五馬送雕輪當  
日趨庭處今朝叱馭身不知諸父老可有舊遺民

記否眞州住山人繫短篷酒教連日醉花看竝頭紅

牡丹開竝頭花袖拂香猶在山青曲已終幸虧賓與主同在畫

圖中君仿西園雅集繪圖紀事

李竹溪觀稼圖

芳隴過疎雨平時交遠風灑灑水初活隱隱花微紅中  
有荷鋤人疆理行南東梳秧如梳髮妥帖安田中幽人  
坐而觀斗笠倚喬松胡爲一秋士而乃明春農學稼悟



物性待年占人功落日未肯歸橋斷村烟封

杭州項金門諸公新年雜咏題詞

一卷詩傳記事珠依稀風景歲華初西冷六逸眞才子  
能續昭明錦帶書

小別西湖四十霜新年還記幼年忙而今再看宜春帖  
恍作前生夢一場

題溫十三郎小照

溫伯雪子來持畫索詩篇羣公未有字請我開其先我  
乃開卷觀玉貌殊娟娟科頭長松下松花盈其顛竹枝  
秋痕滿菊影寒露偏有扇不搖風恐散花中煙有樓簾  
不捲有美樓上眠身非此中住心倩此圖傳畫餅雖難

啖畫意慎勿捐不羨此圖樂羨君此意賢人生富歲月  
誰行思山泉卽以君家論茲圖皆鬼焉阿五入吏部冷  
面赴熱筵阿七奔霜雪簿領紛糾纏卽如子才子三十  
三歸田白雲雖在山黃髮已垂肩何如畫中客張緒方  
翩翩楊柳爲君綠芙蓉爲君妍文鱗爲君媚紅葉爲君  
鮮難得隱君子又是美少年笑殺徐福痴入海求神仙

六月十六日李再來副戎招飲月下

斜陽西下晚風清隱者敲門鳥不驚同挂輕衫溪上坐  
酒痕涼處月華生

崑崙奴子盡能歌團扇聲稀子夜多聽到清商花似雪  
柳陰舞出一羣鵝

望山宮保招飲夜歸次日呈詩

南衙文譙夜歸遲路上春燈欲散時不是絳紗深立雪  
謝公風調有誰知

蔡蔡官鼓蒲街春犬吠柴門月色新只有梅花開不儘  
留香還待醉歸人

望山亭上雲千疊不繫舟邊柳數行天賜相公娛老處  
江南原有午橋莊

收到和章疊韻再寄

六章長調酬新韻想見仙雲繞筆時從此傳箋幾時了  
九花虬馬定先知

公好疊韻往往八九疊不止

才高湧出墨花春韻自天然句自新吟到夜深公自愛

後堂恐有未眠人

送來舊韻曾三疊惹出新吟又幾行從此陸家須改號  
荒莊不是是詩莊

題蔣愚谷海市圖

東風吹海珊瑚長紅冰凍碎玻璃響金輪高挂扶桑枝  
樓臺影立煙波上綠髮仙人下洞庭手扶玉杖風中行  
未騎赤鯉乘潮去且把雲璈隔水聽金光一葉明瑤草  
琳宮絳殿知多少王母樓前笑語聲依稀似怪蟠桃小  
仙娥幾隊唱霓裳曳雪牽雲環珮涼笑指瓊花呼鳳採  
戲擲珠子勒龍藏星眸下視塵飛處水上千重萬重樹  
小別千年尚識君拈花素手招君去我勸先生莫泛槎

蓬萊水淺易揚沙豈若島邊遊戲好六鰲釣盡不歸家

贈蘇州孔南溪太守

入國先問禁采風當問叟我來蘇州城聽人說太守觥  
觥孔君魚賢聲滿人口卻物懸餽魚治豪拔巨匪郡中  
有嬖人納粟拖印綬羣吏皆唯唯先生獨否否黜之告  
長官名器才不苟又有霍家奴駉馬攔街走忽遇李橫  
衝方知霹靂手強禦非所畏鰥寡非所狃市無朝飲羊  
村無夜吠狗魯柝使邾聞晉盜往秦走其餘善政多難  
以陳某某我聞大懽喜是我同年友我未謁崇轅公先  
訪衰朽班荆雨後天揚解花前酒昨日泛太湖雲夢吞  
八九寄我尺素書欣然慕煙柳我道公胡然君恩答

高厚火烈學鄭僑

莊中丞嫌公有火氣故及之

春溫兼杜母潛菴

中丞姑蘇遺愛久願公步後塵俎豆相儕偶故人腸尤

回特贈詩一首

余與省堂觀察同學同年垂五十載矣花甲後各

生子女遂訂婚姻冬至前七日省堂爲蹶父相

攸之事小住隨園出姚夫人小照命題

白頭潘岳最神傷遺挂驚心賦悼亡描得團圓奴坐影

開看當作返魂香

密語纏綿繡閣中勸郎處處布仁風方知絕代龔黃續

內助還憑尹媿功

買得鸞膠續斷絃能詩能字貌如仙生前倘抱衾裯待

敢問夫人憐不憐雲南殷姬生全寶者

少同筆硯老絲蘿天與姻緣天執柯我抱嬌兒拜圖畫  
畫中更覺笑容多

梅圃臨石田畫作自已小像索題

石田逸興發偶畫秋天山梅圃臨此畫將身坐其間  
桐影何簇簇流水何潺潺取巾臨池洗呼童將琴彈此景  
原瀟灑宜君愛不釋但笑作畫時並非爲君設豈料百  
年後君身竟闕入後畫旣爲主前畫翻爲客疑是石田  
翁與君舊相識

薛壽魚新得外婦教余平視而觀以嘉名

老去評花律最嚴偶然月墜水精簾喜儂得見傾城貌

爲爾高歌阿鵲隨

龍爵靈蕭耳莫聽雲華兩字記分明他年倘赴龍華會  
防有仙人問小名

翠渠周公綬安應政詩示其孫幔亭

桐鄉祀朱邑廣陵思張綱民心相慰孚一日如千霜翠  
渠周夫子斑管垂芬芳偶著桐汭績其民不能忘弈弈  
作寢廟春秋爲蒸嘗腰臘走村翁吉蠲陳犧羊厥孫幔  
亭子偶泛一葦杭適值修廟日萬手來焚香見孫如見  
祖老幼走相望相隔十二葉神主親捧將翻愧子孫祀  
遷祧已茫茫道路咸額手感此神應長果然古賢人其  
後乃必昌人生有俎豆原不定家鄉不在樂公社亦須



兩廡旁三復循吏傳使我心感傷

李娃曲爲吳四郎作

姑蘇有仙李生長婁門達其花光灼灼粲爛如雪霞阿  
爺訓童蒙窮老長咨嗟教女勝教子終年守絳紗飛燕  
才擁髻碧玉初破瓜鴝鳥前致詞爲女覓良家衙官吳  
四郎磊落多才華燕京路雖遠一水未爲遐鄉亭職雖  
小朝夕能排衙正室周夫人嚴妬無所加其旁諸姊妹  
巧藝彈琵琶兒居第三位牌合良堪嘉女兒濃笑答無  
用汝搖牙兒昨得吉夢繞屋生蘭芽嫁得少年壻此行  
良不差不貪金爲釵不須玉作珈只恐三纓布便坐七  
香車前年臘月八簫鼓送香茶奴衣紅氍毹馬馱白鼻

駟入門占吉日舉室懂聲譁吳郎得此女嗜李如嗜痴  
旁妻見此女比貌如比花崇明作官去大海揚風沙與  
女同乘舟望洋愁驚他歸來畫作圖欲比張騫槎題詩  
香墨滿添箱衆口夸我與金日磾調賢村誓欲瞻吳娃先  
期作步禱錦帳偏周遮次日設九賓捲簾拜麗華低語  
荅客問淡粧梳雙了劉楨平視久美玉無纖瑕今夕復  
何夕明月雲中斜歸來語妻子果然佳人佳

贈林鐵簫

西京王子矧自謠爲洞簫子今二千年清風久寂寥林  
君高才與之敵含商嚳徵詩清絕偶醉高陽酒肆中買  
得鐵簫一枝鐵鐵質清堅色晃朗非天與氣吹不響先

生吹鐵笛吹絃按孔摩挲時在掌旣不能吹向明光宮  
九天樂奏歌三雍又不屑吹向吳市門學楚子胥乞壺  
殮乃囑吳道子圖形松竹裏柳穆穆兮石齒齒科頭披  
青衫曳足拖芒屨覓句若有思安坐不肯起噫吁嘻我  
知之矣君本孤山處士家一生心事屬煙霞或騎黃仙  
鶴或招綠萼華我願爲君捧簫同到西湖去一聲兩聲  
吹落古梅無數花